

四庫全書

集部

欽定四庫全書

集部

竹隱時士集卷二

詳校官庶吉士臣陳若霖

侍讀臣孫球覆勘

謄錄監生臣孫永台

欽定四庫全書

集部三

提要

竹隱畸士集二十卷

別集類二 宋

臣等謹案竹隱畸士集二十卷宋趙鼎臣撰

鼎臣字承之衛城人自號葦溪翁元祐間進

士紹聖中登宏詞科宣和中以右文殿修撰

知鄧州召為太府卿其集見於宋史藝文志

者四十卷陳振孫書錄解題云其孫綱立刊

於復州本百二十卷刊至四十卷而代去遂
止是在當時板行者已非完本劉克莊後村
詩話又云竹隱集十一卷多其舊作暮年詩
無棗本所紀卷目多寡頗不合疑克莊所稱
十一卷者乃專指其詩而言也鼎臣宋史無
傳其家世無可考獨集中有繳進其父元祐
末所上河議奏狀一首今考宋史河渠志元
祐紹聖間水官建議回河獨轉運使趙偁不

以為然力主北流之議疏凡數上言皆切直
與鼎臣奏狀相合是鼎臣即得之于淵源有
自其後嘗往來大名真定間與蘇軾王安石
諸人交好相與酬和故所作具有門徑能力
追古人劉克莊稱其詩謂材氣飄逸記問精
博警句巧對殆天造地設畧不戢人喉舌費
人心目其推挹甚至今克莊所摘諸句已多
佚其全篇而即所存諸詩觀之工巧流麗其

才實未易及克莊之言故非溢美至其雜文
刻意研練古雅可觀亦非儉陋者所能望其
項背惜原集久經失傳謹就永康大典各韻
中蒐採彙輯勒成二十卷諸體具備蔚然可
觀雖未能齊軌蘇黃然比於唐庚晁補之諸
人則不啻駢之有靳矣乾隆四十六年九月
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

竹隱畸士集卷一

宋 趙鼎臣 撰

賦

鄴都賦

并序

仲尼有言質勝文則野文勝質則史揚子雲亦曰事
勝辭則伉辭勝事則賦蓋賦者古詩之流也其感物
造端主文而辭事因事以陳辭則近於史故子夏叙
詩而繫以國史不其然乎雖然文不害辭則辭不害

志以意逆志其要歸止於禮義者詩人之賦也兩漢而下詞人之賦始為麗淫競相祖述至左太冲則譏之以謂盧橘非上林所植海若非西京所出辭不稱事指為詬病然觀其論魏也舉禪代則以謂虞舜比蹤迷風化則以謂羲熊踵武非堯譽桀誕謾滋甚夫辨物或失其方記事之小疵擬人不以其倫立言之大蔽昔有獨夫既殄天下同歸於周明王不作海內莫強於秦然猶伯夷抗登山之志仲連懷蹈海之義

相與耻而非之况乎助衛君之奸國褒吳楚之僭號
以古揆今壹何相去之邈也方且笑昔人之未工忘
已事之已拙欲使覽者信之過矣嘗因暇日讀相臺
志盛言山川之美宮室之富愛其博而譏其雜於是
感三都因相臺志又頗裁其偽體削其醜詞略前載
之已詳補後來之未備總折衷以有宋之制命曰鄴
都賦云爾

趙子與客遊於三臺之上以望鄴都之城客曰烏虜壯

哉豪雋所宅市朝之區三啓霸邑四成帝都子亦嘗聞
舊史之傳觀相臺之志乎趙子曰未也相臺志何言哉
客曰魏之初基厥惟冀野中奠鄴而居相始冠冕於諸
夏世虎踞以龍蟠亘千齡而高跨其左則浩浩洪河奔
濤涌波匯以清淵之聚沘為黃澤之渦東咽嶽岑而突
兀西陵屹嶻而陂陀其右則太行隆慮玉泉天平聳據
穹壤蔽虧日星隱若疊障巍如置屏斬晉眷以中斷連
代襟而外縈其陽則宜師之溝司馬之泊交蕩姜之浸

潤互淇泉之脉絡蠱大岬以中峙障驚瀾而猶却倚綠
竹以彌望豐邦儲而利博其陰則近控漳滏遠連常碣
水東逝以委帶山西傾而墜玦廣逕方軌平原四達幽
扼吭以形茹趙咋喉而氣奪若乃厥賦上上土厚水深
種稂蔽野桑麻耀林項必萬秉畝皆百金錯輪轂於塗
中資菽粟與縑絰有葛屨之遺化故雖富而不淫爾其
雅俗推重尚氣矜節三晉之豪四君之俠顧眄刃挺喙
鳴背裂驅市人而一戰可捷秦而係越故其物夥財阜

兵雄勢張擇要塞以胥宇據膏腴而造邦思重閉以固
國務崇宮而濬隍笑前帝之阨迫圖後王之煒煌怪瑤
臺而各瓊室詎數阿房與未央蓋其號也前則銅爵金
虎顯揚太武後則涼風清都鴛鴦鸚鵡鬪雞戲馬之榭
赤橋紫陌之籞聳飛閣之千雉聯危譙於百步玉壁珠
簾銀楹金柱不可億記而指數豈直千門與萬戶偉鳳
陽之特建飾翔離之雙鳥何帝子之懷彼亦矜能而護
巧物太盛以弗禁假飛柯而匠天帳靈質之難駐忽溯

波而孤矯伊仙都之肇造恢華林之舊規傾地產於土
木殫心計於般倅嗟燕翼之敗度反歆羨於窮黎諒習
侈以玩富豈艱難之與知故其制創之廣博締構之穹
隆藻飾之瓌麗觀眺之疏通升而瞰之則翼翼眈眈雲
儲霧涵泰華僅形於培塿辰極才映於楹欄類竦身於
天表迷不悟於北南仰而瞻之則炳炳鬱鬱烟霏日出
但聞絲竹之音環珮之聲似蓬宮之彷彿於是孟德李
龍之際慕容渤海之儔鹿既獲於羸氏羊方絜於宗周

則燕則譽以邀以遊莫不宰割區宇分裂華夏邀乙發以計功揖高光而第課正南面以居尊襲冕旒而朝羣下於時親女畏力旄倪戴仁來享來貢或臣或賓彼孫馬之旅拒潛竄迹於江濱如黑子之塵著亦何與於藩鄰若乃汎覽九原周流四垸求故老之謠詠訪先民之典型過美里而太息悲伯昌之繫囚聖人發憤以儲思演微言而作經則天人之學所由興也邦有淫祀西門發之野有巨浸史公決之或螽或賊岑君過之生歌死

哭齊民悅之則守令之賢有善稱也周鼎既震尉遲抗
鉞隋歷方季堯生挺節墓藏太尉之骨衣濺侍中之血
力殉廟社氣凌冰雪凜芒采以映世雖身摧而志潔則
忠誼之士藹令名也吐實為秋揆華為春彫刻造化鑪
錘鬼神唱則應劉徐陳和則邢魏子昇儼思王以獨步
若衆星之拱北辰則文章之美擅英聲也爾其洞穴漫
汗仙靈屈竒絕伎之所興起肥遁之所幽棲酒千里以
噀火丹一丸而療飢孫登放浪於譎詭佛圖巧幻而瑰

琦森逸駕與雋軌差難得而備知若僕者徒据據於舊
志譬猶萬鈞之一釐故言其地則四境莫及論其人則
一邦有餘古在前以不足今居後而豈如首相曹甲起
躡奮踏當塗繼興遂城遂堞三高厲吻以旁噬二石磨
牙而外獵率皆裨壞補敝披圖案牒据之則捷去之則
怯得之則為婦失之則為妾縣奕姓以傳祚常銳鋒而
不懼夫豈代無僻主哉亦云形勢之所挾也是以文命
敷土厥載惟冀美哉山河武侯所偉遠非朕於聽音邇

萌芽於望氣故張賓慷慨以揆策崔光懇激而納說元
氏弗康卜雒之陽曾二帝而乃蹶信人謀之不臧逮夫
李唐中葉有震且業彼慶緒之孤童奮塘肱而拒轍由
藉險以憑固故王師之不涉以是觀之人無賢愚而地
有厚薄兵無利鈍而勢有強弱諸葛家蜀而破宣尼用
魯而削故僕以為冀不常重於天下而鉅鄴獨雄於河
朔也豈不謂然哉於是趙子慨然而歎有問而荅曰異
乎吾子者之撰夫登高能賦者非以耀文所以辨義也

陳詩觀風者非以娛目所以驗俗也故陟景山者見中興之美館雒汭者思平成之功未聞商頌有固圉之談夏諺啓崇墉之論也今客誦糟粕拾腐餘掉三寸之古美六尺之軀指金湯為仁壽之域謂干戈為禮義之塗長王追貊主盟裔俘遂欲霸燕趙而帝齊魏凡二京而父三都是猶蒙鳩豕蝨擇蹄而繫葦自以謂有王侯之樂安土之娛曾不知風摧火燎率糞粉而遽焦枯也褊居晉鄙狹隘沮洳子遷姬系滅迹失据雖無忌之傑點

亦何延於天祚炎風不競典午委馭故使阿瞞與賀六
得鳩張而跋扈况值羯胡與鮮卑豈止餘分而閏序當
建安之考室異日月以齊光奚三馬之不戒俾一槽之
遽亡彼季龍之侈恣縱地陷以天崩曾僵齒之未腐遂
流水以飄零凡此皆莫紹其終無傳於始三光之所不
緯五行之所不紀危朝菌之待暮徒倏生而忽死而吾
子則美之豈其惑於舊貫歟胡取舍之不韙也自昔屬
辭之士綴翰之徒不務明五典之常道九疇之盛符乃

惟夸國炫域度城計邾較廣狹以誹訾無異商屨與賈
區蓋尚東都者以伊洛為帝王之里主西京者謂峭函
為天子之居甘泉遠蔭於西海上林左引於蒼梧將舉
美而章惡信欲近而返踈左生崎嶇遵迷遂誣拏三國
以等競角蝸牛之所廬不獨陵轢岷蜀詆謨句吳而已
又將超秦越漢汙唐清虞尊盜臣以擬聖謂義熊之可
踰客又實之豈不過歟僕病木訥而倦於談雖然請為
客粗陳其靡者子獨不聞皇宋之光宅清汜之規摹乎

背澶面譙挈鄭提曹非宛非鄴不瀍不峭邦畿千里坦
然四郊環萬國以面內類百川之海朝殿初生民繡唐
之緒紛綸后辟易代以五咸罔堪於顧天乃眷命於藝
祖當此之時陵谷易處天地否閉野有輿尸室無噍類
國靡一定之民朝乏委質之士冀媮食以終夕敢燕居
而卒歲帝用不蠲既薶既薶掃挽槍於一鼓盪澆殪於
崇朝援赤子而出塗炭謁大命於旻霄蚩蚩遺黎不徒
去亂即治誅蓬刈蒿乃復慈母遊樂郊安太平之後笑

悔既往之先咎既而人獲更生時有遠慮成周飾闕以
望幸西鑄清宮而請御臣懷良敬之策士獻班張之賦
咸榮古以陋今膺雷同而景附天子穆然載思而未俞
也乃規乾矩坤與神合契靈謀睿謨盡屈羣議即故國
以營基懋皇圖於億祀蓋謂洞庭夢數昌若以四夷為
守未央章華孰若以六合為家方且陟岱勒華裒神翕
河建道德以為營衛詎論丘垤與汙沱至於體國經野
之法宮室苑囿之制寢不踰廟菲不廢禮姑以備一王

之軌儀同百姓之欲利固無偽采與淫泰疇克夸詡而
奢麗若乃風俗之純懿政教之緝熙人物之磊砢貨殖
之陸離既立談而未判且非創業之樞機徒尚口以譁
衆亦鄙人之不為也皇皇百年顯顯七世堯父舜子神
傳聖繼無增尺帛之奉不益十家之費晏然磐石而覆
孟若天維而地置遂使豫里輟險雍郊弛防江靖建業
氣清南陽洞外闔以不閉咸變雍而樂康於維此邦陶
醇化醲川潤岳峻旁薄虛空蒸粹炳靈降為英雄作我

國棟時惟魏公勲在社稷行銘鼎鐘非后收與伊稷疇
並芳而此崇茲乃相之所以隆也客遂畧之鮪鯢陸梁
峻宇彫墻蘊醢庶類黜灼一方斯乃鄴之所以亡也客
顧樂之意者非相人之志盛德之事縉紳之所宜談國
史之所可記也客又不聞媯氏陶漁三年成都商盤五
遷邑無奠居安有擇地而化被簡民而信孚者哉將吾
子未之思乎於是客乃詞彈辯屈不悖自果泚穎却避
懵然若失

堯山賦 并序

堯山在縣北十里不甚高大四望皆平川而居中巋然特起按圖經堯嘗登此以望洪水後人思之立廟其上故以名山因以山名縣元祐己巳冬余以童子侍親過之追感遺跡為賦以叙之

當季冬之嚴凝兮馳燕路之駸駸攬征轡而躊躇兮過堯山之巖岑按圖牒之所傳兮得遺迹而追尋曰堯嘗登於茲山兮望洪水之湍滂嗟皇天於艱難兮在聖人

而憂患物何生而不樂兮獨水行之漫漫曾九載之莫
息兮舞魚龍於波瀾惟聖心之焦勞兮念元元之不食
舉鰥民於側陋兮登咎夔與禹益雖羣后之奏功兮匪
自安而用逸登茲山而四顧兮憂蓋深於已溺余誠無
心於黃屋兮哀赤子之將魚苟一身之可濟國兮固何
有於捐軀賴文命之底績兮卒大安而晏如嗟殷季之
怠荒兮侈天位而自康峻瑤臺於深宮兮民或亡於蓋
藏犬馬飲夫梁肉兮士或未充於糟糠惟口腹以縱汰

兮孰卹民之否臧既上下之覆隔兮終淪胥於喪亡仰
堯帝之孔仁兮軫父母之至慈流惠澤而到今兮民愈
久而慕之即山巔之崔嵬兮尚經營其神祠儼衣冠與
環佩兮猶髣髴乎天日之姿瞻遺像以興嘆兮故老對
余而嗟咨悵徘徊而不忍去兮夫孰知余之所思

學古堂賦

并序

秉之主寶應簿書之明年新作燕堂而大夫石侯名
曰學古為記以揭之於是鼎臣方侍親於京師聞而

慕焉思欲從下客之後塵追二公之英遊自以謂不可得也乃為賦曰

秉之將慶學古之成乃諏吉消剛陳壺潔觴肅厥僚友
燕于新堂酒中樂酣客有言者曰猗歟美矣經始偉矣
卓哉顯矣寓意遠矣孰登斯堂而味其誼我即於名爰
得其志今也方策古之聖賢翬俯仰以萬世忽顧瞻而
億年炳徃行以不沒繁流風而具傳宜乎高居以拱揖
燕坐而周旋有以師典常而取訓不徒侈游憇以相先

也椎輪於室不量輒而自通察影於鑿不度形而自同
雖世忽悔顯道常汙隆有禮樂以治性有仁義以飭躬
行既往以無敝播方來而靡窮固可騫精思於物表挹
芳馨於穀中矣在官彬彬拊循吏民退休愉愉討論詩
書朝而出以古為律夕而居與古為徒得於內者充我
之不足發於外者推吾之有餘吾聞古人學無終始旦
安窮閭暮都顯仕居廊廟以儀衆幹魁樞而自已詎不
慮而遽能哉良素修之有以也今使來者歷階得從政

之方舉隅佩入官之誼仁見之而隆仁智見之而晞智
蚤夜匪勉起居顧眎由此而為公為卿有爵有位資古
道以長民懋儒風而迪世亦不出於函丈之席而數楹
之地也然則後之君子能無樂於是歟乃系之曰於樂
有堂匪與且輪兮若古是訓如見其人兮既種乃德將
惠我民兮來者勿怠益紹以新兮

寄傲齋賦

趙子新作寄傲之齋既成客有見而笑者曰噫嘻嗟夫

環堵之墟瓦礫所儲高裁隱頂廣劣容軀白日穿漏寒
風嘯虛褊淺迫仄悶若囚拘先生學不足以稽唐憲虞
行不足以左規右模勢不足以濡乾潤枯設不足以出
有入無動廓落以無偶居寂寞以無徒風吟雨呻飢腸
叫呼飯不滿腹見嘲妻孥衆將傲子以弗忍顧子反寄
傲於誰歟趙子曰吁是則然矣而客責之不已甚乎吾
儕小人志不願餘在山而樵在澤而漁或跣而步或乘
而驅隨所寓以皆適吾又安知夫窮達之所殊貧與賤

吾不侮富且貴吾不諛將修敬以不給顧何傲之敢圖
在陰則慘在陽則舒凜霜雪之戒候追葵藿而起余遡
愛日以擇地得幽人之所廬匪斲匪彫既治既除信容
膝以有裕廼左詩而右書時縱目以流視追冥茫於古
初友聖賢乎千載同古今于一區有治有亂有賢有愚
有得有喪有隆有汙有去取以為之寵辱有褒貶以為
之賞誅或雲而龍或泥而猪或憔悴於邱壑或榮華於
國都前哲紛紛以既往後生皇皇而益趨森萬物之情

爲了坐判於錙銖無異登藍田而採玉據合浦以求珠
凡世之所謂壯觀巨麗者固已盡載於吾居矣吾俯而
入若滄海之浩浩默而坐如夏屋之渠渠不知天地之
廣大日月之疾徐軒裳之照耀俎豆之蕭疎將以是而
寄傲也何如客曰唯唯於是乃頓足而歌曰吾不如騶
侏儒錢多粟飽兮偷以賄其膚吾又不如嬰之夫附炎
炎兮貌愉愉獨衣被於簡策兮咀前載之膏腴嗟來此
寄傲之室兮此中聊可以與娛

二二七ノ人ノ三

卷一

欽定四庫全書

竹隱畸士集卷二

宋 趙鼎臣 撰

四言詩

案四言詩共二首俱集詩句

喜晴

并序

吏滋不德以為神憂閔旱而獲雨愁霖而得晴其求
紛然而神終不之責暴之秋陽訖我穡事豈惟吏之
幸將民與國家實欣賴之謹再拜受賜

我田既臧零雨其濛嗟我農夫憂心冲冲穀旦於差薄

言往愬謂天蓋高上帝臨汝杲杲出日有嘒其星穫之
揜揜我倉既盈薄采其芹于彼行潦神之聽之無德不
報

昔我往矣思君子也高陽之從事過瀛之野作
河廣詩而匿其名使者唐侯獨見而知之故賦
是詩

昔我往矣作爲此詩凡百君子諒不我知惟彼碩人眷
眷懷顧彼何人斯可與晤語召彼故老周爰咨詢予忖

度之所謂伊人實獲我心將恐將懼顏如渥丹畏此譴
怒維彼碩人顧我則笑如切如磋匪怒伊教自古在昔
哀鳴磬磬衰如充耳莫我肯勞嗟我農夫出自幽谷如
蜩如蟬其何能淑維彼碩人追琢其章欲報之德不可
弭忘

五言古詩

宣和四年五月辛亥詔以神宗皇帝所書鼎說
十二字藏於延英閣臣鼎臣賦詩以紀其事

孤臣生苦晚，僅及熙寧初。雖靈化育恩，不覩衣冠餘。嗚呼！丕顯哉謨訓，存諸書議論。畧秦漢制作，追唐虞每聞。父老言太息，涕淚濡不意。垂老年，觀此河出圖。禹鼎淪泗水，異說紛相誣。蔽之十二言，一洗諸儒迂。天意蓋若曰：世定後，聖無要。當繼禹功，千載與之俱。各力所未遑，翼子其付諸崇寧果圖功。繼志若合符，屹然奠九鼎。四海安覆盂，此書天所錫。制器實權輿，巖巖寶閣尊萬靈。所依於嗟爾九州民，跂行與蹶趨。瞻之必稽首，過者當

下車

余少時嘗種竹於所居之南號竹隱今二十年矣而隱之志益未遂也孫志康善篆嘗欲得竹隱二字題其上因叙所以為詩以乞之且呈好事諸君子各乞一詩以為舊隱光華

先君昔謝事勇退不待年區中五畝宅郭外二頃田歸裝無一金買書費萬錢余時老萊衣方冠絕可憐賜第殿東廂棄官天北邊

余元祐六年賜進士第調真定府戶曹參軍以親老不赴耕耘

具甘旨采掇求蘭荃積竹南墻下清陰頗蕭然謂此可
隱矣曰余其老焉人事喜齟齬壯志誠遷延身遭患難
餘仕為飢凍牽浮舟客江湖仗劍臨幽燕兒女道路長
歲月鞍馬捐一與故隱別違此成華顛傳聞釋龍兒一
一長刺天出處令人悲太息夜不眠同舍有孫楚筆勢
何翩翩未甘丞相後不許中郎前何以慰此君白子翰
墨妍持歸榜吾隱不翅青玉鐫異時儻過我物色揚雄
屢貧家何所有滿林玉碧鮮渭川已太廣淇澳空自賢

君看青琅玕知我非臞仙

次韻滕子濟禮部考古圖

蒼史失古法赤刀有遺書經毀秦漢後器追禹夏初古
人不吾接有感誰與祛尚憐盲左生文字記魯壺哀哉
泗水没不復知鬼魑英英華省郎攜撫收遺餘異書人
不識善本手自摸壁中發科斗海底出珊瑚篆籀既識
職鐘鼎各應圖要當知百世何止舉一隅似逢東里生
張華與之俱談傾河海江下卷鄭白渠我老塵埃中牒

詐慘不舒思陪種柳潛願逐耦耕沮錦囊不應開欲和
聊復徐頗憐平生心用意真僻儒識字恨不博塊焉無
與虞圖書許借否髯滕意何如莫作驪龍仙靳吝五色
珠鳩夷或未辦當奉酒一盃

詩序虞與娛同古語云借書是一鳩鳩夷酒器古人

雖假借必有禮以將之今流俗誤以鳩為癡非是

讀史戲作

相如故倦遊偃蹇臨印市主人敬嘉賓供具邀車騎酒
酣樂未闌跪進絲桐戲勉鼓一再行四坐皆心醉潛有

知音人獨會求凰意傾城不待媒半夜行雲至忽駕軟
輪車遂拋沽酒肆建節還故鄉拜爵文園吏衛霍老疆
場嚴朱死謀議搖頭喚不前日高花裏睡

即事

昔日同門生頰弁彩華纓當年總角彥東帶揚王庭故
人憐我頑千里特寄聲開緘亦何言終篇歌鹿鳴舉手
謝友人愧君鄭重情鵬鷄各有適枉尋余所輕

楊時可作十詩以寄河間詩之所及非吾僚則

吾友也因悉次其韻以和之又以其所以贈我者復贈時可作還字韻

久伏東海濱竊慕暴公子一朝乃吾僚幸會有如此白

髮裹青衫誰要相料理吾猶及老成餘音聞正始

右孫志康

仕官百僚底文章兩漢間著書雖寂寞此生那可攀結

交論意氣恨別阻河山屢過揚雄宅令人載酒還

右楊時可

霍侯塵土中衣破露兩肘一錐聊自置四壁初何有長

安可得官高門日奔走問君求之歟願我搖其首

右霍子磐

翰林門戶壯九子賢至今梗楠及豫章磊落皆成林恨
不徧識之此郎傾蓋深儻封降胡椒燕子披其襟

右錢遜叔

伯言

形骸本蘧廬况乃妻子累朝市無恬波山林有深意可

憐箕山孫骨體真不媚歸歟定何時寄我招隱字

右許少伊

髯也伏鹽車乃實千里足其學本孔孟亂以佛所錄捕

景而繫風雖辯吾不欲如髯真絕倫恨此持論曲

右劉仲忱

劉嘗與余論世一二士大夫頗不相契故以此為戲異日可拊掌也

詞源傾江河坐覺畎澮褊王郎清如水腹有談天辯閉

置邱壑中名譽當自顯而况金其聲行矣侍從選

右王履道

俗儒守一編賤目則貴耳不識古人書豈識天下士君

看李長吉可但州縣已異時鳳來儀故自阿閣起

右趙伯山

濟濟八才子醞藉有此郎交情苦踈豁子職甚温良一

為江南行書疏頗相忘媚婦乃如許盈盈不下堂

右張伯元

伯元娶婦未歸

叅軍喜吏事咄嗟能輕軒短小精悍姿使人醒睡魂他

年解千牛妙絕難寄言堂堂聖獻肅吾猶識諸孫

右向仲告

次韻志康病起

八十用鷹揚萬里封燕領一擲遂成盧再索僅得坎命也天所司欲言吾不敢不見孫先生有美長不穆何曾少卑之坐是得坎窞平生讀書苦求味在檄攬凜然剛毅姿身大不及膽滿堂進糴葷長跪出昌歎嗜好苦乖殊持此欲誰覽貽我病起詩慨歎發悲感君看彼芬絲見用即衡紱得失付天公吾屬可無憾

病目無聊因遊慈雲寺作詩呈諸友

造物本兒嬉萬彙同一甌陰陽燒煮之有此生老病我

今知命年過二不為盛

孔文舉云為始滿融又過二

此身付天公窮

達聽其令胡為生纖雲翳此秋月淨坐令盲老翁悲敵

雜歌詠醫云肝來母交惡若周鄭欲知壘不耻要在瓶

母罄至言若金篦刮膜除蔽映咄哉耕田夫所得已負

乘當求揚一厘遂卜將三徑閉目存黃庭燕坐收雙脰

回首謝蓬萊問路安敢更

次韻杜公美充贈張永錫

平生喜交遊臭味在筆墨身居大梁下家寄黃河北異
哉長安市一日見雙壁相逢塵埃中過眼我獨識從今
袒褐姿不復憔悴色更復許言詩賜也當避席

李漢老邠見過不及見以詩謝之

埋沒簿領中氣結不得吐官柳欲飛花春事遽如許騎
馬出東城意若鴻鵠舉獨行雖少味自足寬靡藍歸來
兒女曹恠事說鬪縷有客適過翁身騎五色羽自非翱

瀛洲恐是翔紫府雲來久躊躇鶴去迷處所我老俗吏
中人物誰比數賴獨有故人慰藉能偃俯一臂乃失之
遇事真齟齬朝來益癡絕物色徧庭宇尚尋履迹餘用
意毋乃魯

郡僚出塘灤唱和詩次其韻

水窮瘴海南陸盡狼胥北祖宗受之天以為冠帶國維
時耶律氏好亂樂禍賊夜動鼠穴中陰計屢以默廷臣
請加兵薄伐陳往則堯舜仁如天一言羣議塞幽燕亦

吾民此意多不識至信及豚魚深恩被動植古來戰場
地父老今力穡耘夏水泱泱獲秋禾翼翼當年守邊將
至今猶血食烏虜戰危事勝敗有失得祖宗諱言兵陰
功千萬億不見陂塘上溝塍如組織傳聞天驕兒頗亦
知帝力祖孫相付授日夜自約勒慎勿負中原天地父
母德

秉之兄受代還京師余送行次甘陵雨三晝夜
不止十二日乃雪平地幾尺木壓而折者十三

四十五日既別乘之於南郭賦其事以寄王履
道王時在大名

季秋霜未降草木尚華滋蕭索重陽雨黃菊共淒其謂
此膚寸澤杲杲行復晞那知三日霖淫潦方在茲我行
既齟齬我車遂透遲僧房耿不眠半夜寒侵扉開門怪
事發積雪滿前墀雨師技止此更復出新竒兒童叫踴
躍僮僕驚嗟咨云此太早計有眼省見稀天公豈怪我
不樂愁何為幻此十頃玉伸我一寸眉呼兒覓酒家典

衣具醇醪醉中見鄉社命駕將言歸忽憶剡溪友徑吟
招隱詩嗟余興豈盡無因謁戴逵

送李伺誘中將漕江東

顏駟老為郎三世終不過奉春脫輓輅暫見若平素功
名豈不佳用舍真有數况逢堯舜朝士多無著處赫赫
金門開燕子皆鷓鴣天顏若春溫戰栗心恐怖奏事幸
無他求福安敢預李侯衡湘來朝謁苦未屢入對明光
宮爽氣回天顧立持使者節褒語宣朝路自結明主知

千載實旦暮富貴在子耳江南那久住努力加飯餐穩
上青雲去

送唐通叟東南鑄錢通叟嘗攝度支員外郎職
事與之同舍累月

簿領丘山堆胥吏鳧鷖進不須持酒卮正自得醉困賴
逢同舍郎照眼珠璧潤堂堂質肅公勁節森萬仞吾猶
識諸孫王謝有孤韻時時議論餘尚作前輩峻我老無
町畦出口見方寸端須護疵瑕未可失瑜瑾奈何不少

留舟楫犯蛟蜃山澤寶欲興虞衡職方振想常開鴻鑑
不復費游刃明年水衡錢地應無可頓策勲便封侯朱
紫安足論來趨未央朝故人應許認疾走當避公銅臭
不可近

次韻李蕭遠送葉少協赴官陳州

葉夢齡

簿領動移日塵埃紛滿城空令牛馬走坐見鄙吝生文
章雖小技不激安能鳴邂逅得之子接語意已驚談鋒
苦豪放心地實坦平凜如君北斗嚙然吾小星忽聞補

吏去曾不與我評長嘯登扁舟心遠氣甚英先師仲尼
父昔嘗泥此行寄聲陳父老君蓋何當傾湏知此客佳
館穀幸少宏富貴亦土苴名聲忌崢嶸請謝郭子橫去
矣勿觥觥

猶子爽赴官中山竒作詩送之因次其韻

人生貴天真圭角何必露骭髀世雖憎豈弟神所許嗟
爾守一官十年不改故兒寒屢號朝妻飢數啼暮又隨
五斗米遠向千里去中山豨虎屯北鄙咽喉據我昔少

年游夢景墮飛霧猶思鴈塔涼尚愛石文主迨汝閒暇
時尋我經行處聊因起遐想會自有佳趣此外姑置之
勿改平生度功名無巧手富貴有夷路往復版築中時
來猶舉傳

猶子竒從江浙經置陳伯亨之辟八月十日登
舟餞之於郊外作是詩以送之

予越本夷蠻弄兵篁竹中吏士懦不武未嘗更戰攻私
憂顧妻子聞賊內已訐咄哉林武將一旦先望風遂令

六州民老稚遭閔凶天子怒赫然王師出羆熊聊彈一
指端雷滅紛已空瘡痍今尚新噍食若未充如更大病
餘護視頽良工平生陳太邱經濟蟠心胃久持四方節
未食千戶封功名真有時倉卒果奮庸嗷嗷百萬家賴
此白頭翁汝今從其招綠水依芙蓉勿以賤自嫌王事
當匪躬江湖日已清公歸列夔龍行持酒一筥迎汝國
門東

送林德祖致政歸吳中

士論常苦高出語譏古人至其取與間未足了一身官
爵細事爾臭腐實與隣奈何夸者徒薄暮猶逡巡平日
相語此反覆甚諄諄頓輸一著先夫子固絕倫乞身夜
上書妻子不暇詢翩然東南去笑別平生親江山已在
眼邱壑俄生春聊須震澤水洗此京洛塵蕭條西湖上
處士迹已陳夫子今繼之凜然兩逸民疏公不足高賀
老不足珍他年仙骨換坐嘆傾蓋新期我吳市門復見

梅子真

林逋處士
舊隱西湖

崔德符作湖園詩以寄邢子強次韻

吏道如焚絲坐覺意味少我豈無一簞當食自不飽
邂逅崔子真霜林挺孤篠十日九閉門想見獨傾倒悠悠
四十年識君恨不早晤言曾幾何告別驚草草昨枉湖
上作盛贊池亭好平生邢子才投分紆與縞政當樂濠
魚定不驚鷗鳥解榻念君來此意不待曉似聞百花洲

一雨淨如掃

邢乃湖園主人
園中有百花洲

次韻陳修仲題會稽宋尉澄暉亭

鑑湖繞君家近在門前路置亭音未善對面無覓處勝
地天所儲造物費陶鑄惟昔居者誰孰視不知措會逢
賞心人卓犖見深度踈朗引湖山豁達去屏戶開軒明
月來解榻清風駐初無結駟勞恠此咄嗟具更得黃絹
詞當煩神物護

乙未寒食前一日陪姚季一吳和甫登崇德寺
閣賦詩以駕言出游以寫我憂為韻分得我出

二字

東風日夜狂草木困掀簸墻角數枝紅春事亦到我平
生喜追遊雖老意尚頗况逢兩飛黃共欲參蹇跛喟余
麋鹿姿章服強包裹出門天宇寬自視覺磊砢士峻則
少通務達乃多可悠悠何必然所得益么麼不如全其
天曠蕩出韉鎖東臯幸可耕太息願未果

高閣切浮雲仰觀勢崒萃興來偶攀躋意若凌超忽壯
哉洛陽都宮殿聳突兀城中十萬家古來豪俠窟樓觀
何軒昂花竹爭炳蔚澹澹煙靄間俯見孤鳥沒緬懷中

令君節鉞耀袞戟鎮守極膏腴剝剝到肌骨黃金不却
老晚節顧佞佛陂陀何為者歲久尚竒崛空令吾黨士
登踐許倉卒躊躇不忍歸待得星斗出

崇德寺石
守信所建

五月十八日陪同舍諸友遊慈雲寺

室如蝸牛廬氣若炊飯甑身無六尺長當午意已病今
朝忽破顏夥此佛宇盛長廊引雄風爽氣回秋令老僧
喜客來簞竹鋪綠淨書生苦易足妙興發觴詠枯棋響
雷電新唱雜雅鄭放懷百念空縱飲雙瓶罄我衰本蕪

葭玉樹紛照映忽驚涉瀛洲驟喜陪鶴乘日映尚躊躇
欲去不忍徑歸來掩關卧汗雨復流脛賜沐幸許休命
駕何妨更

八月二十日晚涼可喜秋思浩然乘興獨遊至

崇寧寺謁湏上人表以

按表以二字疑有誤

次元聞而造

焉既歸而作是詩

秋風日已佳今我何不樂出門念所之興至不待約言
乘獨往願偶信登山脚道人心似灰白首無住著經自

不下堂為我躡芒屨茶瓶既徐進澗水亦屢酌談從青
山遠思與孤雲薄俯觀市上人擾擾何紛泊向來簿領
中豈復知寥廓兩侯天下士皎若雲間鶴肯作噲等伍
此意真不惡少年悅紛華寒士守寂寞譬如冰與炭志
亦言其各請為東土游一繼支許作

二十日發都門二十三日次潁昌過故府張幾

仲舊居

入門見華屋愴然傷我神堂堂想平生英氣猶逼人園

花與檻竹種植手自親愛之不忍觸欲去輒逡巡緬懷
大觀初幕府參下賓前驅列貔虎後乘邀徐陳縱獵轅
門曉賦詩瀛臺春何曾有天驕安若兒女馴至今帳下
吏徃徃驅朱輪淒涼十年內梓樹忽輪困惟餘一書記
白首走埃塵猥忝刺史符愧彼吏與民公門那敢辱徃
戒猶書紳

發潁昌留別韓次律蘇叔黨

行邁日久遠親舊日已踈眼中惟牙官從我走道途俗

狀誰使汝漸赤由近朱潁川多名士古來豪俠區歷代
愧不能叩門韓與蘇酌我甕頭春舞我閨中姝清言發
談笑嘲戲頗不無使我面輒闊自忘官職蒼斐然欲從
之文字相與娛我行未渠央欲駕復躊躇人生如寄耳
聚散安可圖區區惜別離此志乃非夫臨風但相思有
使即寄書

九月八日曉起絕糧舟中讀書

飢腸徹夜鳴夢亂不能好口腹故累余勉起不待曉貧

家無宿糧庖厨淨如掃力耕可得食此計真不早居然
懷抱惡坐使百憂繞聊復讀我書百家觀浩渺古人骨
已朽爛爛列華藻其言忽起予一覽意自了颯然驚短
鬢怒立何草草壯心激哀懦豪氣變枯槁捧腹故便便
不食今自飽方知道義力非但文章巧吾命豈真窮吾
書可長保從今復何事讀誦以終老不須哀王孫為謝
淮陰姬

夜行見懷

家無儋石儲日費千鍾飲避謗醉為鄉嗜眠書作枕忘
機鳥已馴有道魚不淪栖遲天一涯浪漫歲三稔日月
漸悠悠肺腸空凜凜平生師孔孟夙昔陋顏沈膺門感
恩義噲等荷題品仲修先生大
夫之門人也報德力未能量已事已
審新詩辱雕鐫浩嘆忘食寢但願酒不空何事文如錦

贈翟二淳老

去鄉今幾時未易詰晦朔但聞葦溪頭稚柳皆把握老
豈私我哉浸潤不頓覺攬鏡忽悟渠鬢雪頗斑駁喜聞

貴人來文字得商推故人五十滿髮黑面丹渥乃知出
處間相去如許邈新詩愈豪放談笑出飛電留之不肯
住告別意苦確嗟我獨何愚斗米尚俛啄詩書久遺忘
志氣日齷齪詎堪劇劇繁所願斲境埆歸田不須謀老
圃安用學東臯會相從共醉村酒濁

次韻李祖武道中見寄

江南綠水幕塞北黃金臺方當漢道隆威靈暢九域從
軍豈不樂顧我非其才十年塵土中滿胃貯黃埃主人

恩義重彈劔思一來居官自忝冒揣分豈遭徇免識翰
林孫一見青眼開不許執手版便容持酒盃題詩遠寄
我欲及未開梅北枝寒已甚正待使君回

方時敏以茶餉李蕭遠因作詩止茶其弟元若
允迪聞之謂茶不可止和其詩復以茶二餅寄
其兄三子皆余所善也時敏既止茶不當復受
允迪之餉而蕭遠巍然亦不得以獨饗也故次
其韻以請二子

得士一夔足我獨交兩方腹有書五車家無錢一囊人
皆不堪憂愠色渠未嘗大馮河梁上正作龜頭藏西山
挹爽氣北窗傲羲皇對茗不肯飲醉倒溫柔鄉泮宮有
矚仙野鶴姿昂昂少年苦書淫壯歲惟詩昌平生重取
與一介分毫芒受况獨不辭大噉意甚長我本田間人
雖老尚木強邊韶請割席陸羽願升堂破鑄雜薑鹽煎
煮我所當勺子龍鳳骨澆我藜藿腸

既和時敏止茶詩矣而允迪所餉猶未及請再

次韻求之

鈎繩異曲直鑿枘殊圓方
蛤死不脫殼錐穎要出囊
風蛇互矜憐蚌鷸相探嘗
紛然天壤間巨細靡不藏
孰能使之齊賢哉我未皇
付之將毋同蠻貊猶故鄉
方生天馬駒頭作千里昂
平生剛褊心立朝慕周昌
置之岷山下所用乃針芒
苦憎茶擾人能妨春夢長
季也謂不然辨理殊堅強
我欲兩可之笙磬同一堂
楚人固失矣齊論亦豈當
請歸亡是翁文字搜枯腸

允迪和詩各茶弗出而約以棋取之再次韻

仙人爛柯山坐隱多竒方我昔夢見之正爭紫羅囊豈
獨寸筩窺固已一齧嘗至今不語妙了了皆中藏陋哉
王積薪亦復干帝皇遠矣羊玄保恨不同閭鄉誰與子
方子忽作鬪雞昂居然鐘其鼓甚矣子之昌吾師乃庖
丁未嘗嬰刃芒遙知吾髮短不必終纓長明朝受敵降
築壇千步強沙溪委道周北苑陳中堂想復聞我言怒
欲奮臂當竟無百勝策空有九回腸

余以雙雞餉彭子發初不知其皆雌也既而易
之其謬如前子發有詩因次其韻

家貧苦厭雞梁稻費畜養群居頗狼籍庶類日崇長持
以贈東家料擇增鹵莽經旬默不鳴先生為拊掌馬也
牝而驪達士有遺相望之似木雞何嘗微技瘡當令守
其雌不必厲清吭開籠鄭女雙對舞江妃兩索我於形
骸見為無乃爽聊復相解頤風來聞笑響

中秋夜楊時可與狄端叔載酒見過月下聯句

月固不可得客亦未易逢

鼎臣

相看且一笑劇飲須千鍾

時可

石交事綺語辯口如劍鋒

流

血指遇巧匠青蒿倚長

松

鼎臣

平生所欣慕今夕獲從容

時可

我出元白後敢躡李

杜蹤

流

競誇詞激烈已覺醉蒙茸

鼎臣

虛文矜畫虎利口

極雕龍誰能望塵拜初不希侯封

時可

雲披蟾影白露浥

桂香濃

鼎臣

河漢淡無色烏鵲迷所從要為青女約從使

蜚廉攻

時可

渡河天女懶搗藥玉兔慵

鼎臣

秋凝霜悒悒晴

解雲重重論功有詞客誤曉驚鷺情農興從庾亮發景為

仲宣供

鼎臣

夜氣淒以冷斗杓橫復縱

時可

文章余所短翰

墨子之丰酒渴思朝汲腸飢聞夜舂

鼎臣

寧盡杯中蟻勿


聽床下蛩

時可

思澁慚追驥篇成類采葑我眠君且去莫

待鼓鼙鼙

鼎臣



欽定四庫全書

集部

竹隱畸士集卷四

詳校官庶吉士臣陳若霖

侍讀臣孫球覆勘

謄錄貢生臣吳士英

欽定四庫全書

竹隱畸士集卷三

宋 趙鼎臣 撰

七言古詩

嘲春詩

天公是春父后土是春母
風雨作春媒桃李為春婦
桃李嫁春來幾時春工不肯使人知
昨夜小桃微破萼漏泄春情春不覺

騎立山禱雨

秦頭東銜楚尾及奠方作鎮神靈集他山迤邐盡徒趨
中有一峯長騎立雨暘吁嗟走祠下神往救之如躍馬
深中百丈寒潭底爵名上公地千里

次韻何德之喜雪

北風半夜軒昂變倒瀉天河飛似霰初驚弱質柔於水
稍意澄江淨如練心知消息到盃盤坐覺精神生筆硯
曉來竹下失青莎鵠立細長三四片似欺趙子軀六尺
欲惱何郎書萬卷詩泉要子涌三峽酒路許吾通一線

可憐頃刻縱如花不奈消流終怯現
經嘗凜冽合增嫌
愛惜為餘猶眷戀
畫莎江上真已竒
歌曲郢中殊不倦
自慚追琢費巧心
欲為不托嗟無麵

再次韻

何郎文章魯之變
句落毫端紛玉霰
夜長乘雪出詩軸
十里銀光搖素練
西山作筆鋒已禿
東海凝冰蓋其硯
欲搜月兔出三窟
肯比崑瑶夸一片
梁園詞賦不收拾
散落人間今幾卷
應憐我窮被雪壓
冷屋號寒命如線

故將佳句發陽春昔也漣漣今覩明白頭嗜酒尚書郎
日給二升心所戀不愁家作四壁空每得新詩便忘倦
啼飢更自有癡兒妄想朝來天雨麪

宋京宏甫見和再次韻

水花浮空出奇變散者為雲圓者霰天翁大是富家翁
細碎剪雲親染練山陰曉起右軍泣不見墨池安得硯
從來緣水不充飢此日正堪批作片書生冷淡惡生活
忍凍悲吟詩滿卷不知北里富薰天舞袖對花裁圈線

紅爐熾炭坐生春本不畏寒那憶覲蘭臺賦風不賦雪
好色豈殊蜂蝶戀不如諸孫藝且賢蜀烹啖客初無倦
諸公速辯欲忘歸盡磨東莊千斛麪

十一月十七日大雪晝夜不止平地盈數尺十
九日雪中與時可載酒相率出郊謁子莊因登
爽亭臨軒縱飲四望浩然瀕洞一色真竒勝也
孫志康畏寒不出已而有詩因次其韻

小閣僅堪容一席西望諸山天咫尺興來踏雪共登臨

徑醉何曾論斗石風前少皞陳堂堂萬騎銜枚替戾岡
傾河倒漢天上落藍寶荆珍盡捲將海邊屬國寒到骨
簾裏壽陽花滿房恨君閉戶不好竒三人醉倒君不知
須憐暖律易消鑠行見芳洲生杜若肯捐凍死求一適
聊畏思歸老莊鳥

洪谷值大風宿避賢驛詩

客行到處可獨宿秋夜已長聊晏眠北風吹燈最無味
明月照戶真可憐兒女漸有婚嫁逼富貴久無名利牽

欲歸不決坐此耳展轉悲歌一悵然

重陽前數日夜坐不寐偶思江南塞北舊遊作
詩呈志康諸友

昔在江東作重九斬新涼氣生杯酒右軍有宅山最高
歲歲與客登其首菊花弄藥天未霜吳兒琵琶能斷腸
半天語笑中夜裏山下人家驚走藏禹穴探書無所得
笑指燕然疑可勒燕南新築黃金臺乃復招我何為哉
五年醉倒南樓上樓上黃花無處放將軍喜氣自生春

盡釋風霜作和暢美人低按小秦箏坐中勸酒一再行
風前孟嘉帽欲落席上孫郎句已成一生散誕無羈束
到處容容尸斗祿况復今年值衆賢珠玉在側真可憐
重陽更欲登高去莫遣風流減去年

子莊出獵僕不與聞志康有詩次其韻

歲窮於冬春未涉雪入田中餘潤接鷹鷂欲擊膽方張
狐兔正肥心已怯忽呼小隊試周旋直並西山窮射獵
將軍約束金鼓震令尹指麾豺虎懾平原淺草陣橫斜

後勁中權旗眈眈林空肯使逸禽飛澤竭不煩追騎躡
正堪大嚼出饒涎安用千金酬笑靨風毛漠漠任教吹
雨血紛紛誰所喋不容杜曲隨李廣顧肯桑間問靈輒
廟謨不戰方兩階邊塵已靜休三捷酩酊如余乃醉仙
雄豪似子真儒俠明朝得雋儻相過買酒尚堪吾倒篋
子莊獵於近郊志康聞之盛贊如臯之舉且督
分鮮之餉再以詩往而子莊不報夫踐霜雪跨
陵谷以從禽荒之游樂則樂矣然未必賢伉儷

之所喜也不然鮮胡為而不至哉故余再次來

韻以索其情

愛君談兵如趙涉往與西人鋒刃接尊前或詆次公狂
市上頗疑韓信怯忽然結束變軒昂駑馬自驅千騎獵
狐狸博碩正吾須烏雀細微誰女懾風馳白羽歛驚飛
火點紅旗時一睜將叔無狃戒其傷君足正應防婦躡
千金之子不垂堂坐使顰眉羞美靨徑當去劔釋皮冠
腥血淋漓休使喋賢如孟光不與謀搏獸於原母乃輒

聞君三日靜思愆，謝過莫如吾計。捷熊膾兔首速分張，
好客庶幾閭里俠歸家。一笑定卿卿，止獵之書猶滿篋。

再次前韻戲志康

賈侯少日規原涉，酒徒劍客交相接。官成忽綰縣令章，
文墨能令豪士怯。滿庭牒訴若沈迷，過眼詩書聊領獵。
發狂正爾不能堪，大叫赫然胥吏懾。西城曉出頗怱怱，
日射圍場光有暎。鹿傷鶴膝畏鷗盤，兔中鵲拳愁犬躡。
獲多意解始開顏，暗覺微渦生兩靨。逡巡下令釋前禽，

尚恐流殷人競喋不知誰忽遣君知佐饗而嘗心頗輒
新詩不減子虛篇喜意似書城濮捷更因乞肉苦譏嘲
句險詞夸終類俠莫瞋令尹少須之報聘已裝珠一篋

余數與同舍唱和而何亨老獨否耿伯順以詩
挑之因次其韻

巧匠未嘗夸所能解衣槃薄初不驚紛紛衆史爭舐筆
我獨以此全其名坎其擊鼓瓦釜鬧黃鐘大呂元希聲
揚雄有口吃不語長安小兒心欲輕一朝胃中吐白鳳

至今千載猶儀刑頗疑將軍固多許銜枚十萬歲奇兵
可憐吾黨有壯士疾鬪不暇金鼓鳴寄聲大耿莫倉猝
火急防渠夜斫營

次韻志康贈武得之得之余同年也

昔年曾伴南鵬擊借我扶搖多少力君雖進寸我退尺
安得揚揚好顏色忽然相逢不相識怪我摧頽凋羽翮
念君家亦仍四壁誰信懷中有垂棘天寒雪凍行不息
相屬一杯空感激

梅花下置酒送潘廷立學正赴官京師因寄博
士王堯明監簿劉仲忱

卧龍山下梅花發舉杯半夜邀明月自從却棹酒船回
一十五年如電掣相逢忽在百花洲玉骨冰姿愈竒絕
粲然顧我低欲笑斂衽對之那忍折應憐我老遽如許
鬢髮摧秃牙齒缺對花不飲可奈何急喚潘郎相煖熱
潘郎趣名許朝天昨日見之今日別莫嫌韓愈困虀鹽
會有王良收汗血同僚滿屋多豪傑倉卒立談難盡說

請於主簿覓于思博士龍頭如玉雪故人儻問我何如

正被梅花惱不徹

余頃官會稽居卧龍山下並舍有梅一株甚盛蓋屢醉焉今十五年矣堯

明廷試第一仲忱美鬚髯故云

均文屢約相過近得書輒遷延偶讀予梅花詩

次韻以趣北轅之約

江南仲御才英發身佩瓊琚冠寶月驂騮未肯就韁銜
乍蹋天街頻齧掣忽然醉裏謫三湘頓覺新詩愈超絕
人疑夫子不堪憂豪氣壯心當少折不知世故轉磨礪

凜凜太阿初不缺歸逢北客笑無言但道湖南苦秋熱
許來過我已三書欲對清樽話離別可憐楊葉漫飛煙
坐嘆榴花空點血平生一諾季將軍邂逅相逢應有說
頗聞列屋盡蛾眉自教繞梁歌郢雪君能輒暇暫來無
莫待新聲都按徹

蔡興兵曹謝曾秀才見和梅花詩復此韻為謝
詩如病疥歇復發最忌春花與秋月袖中縮手苦禁之
技癢不堪時一掣彫肝琢腎神何苦故令眼亂心愁絕

我生酒外百無能病不持盃被磨折暗香浮動正黃昏
獨坐悲歌唾壺缺麓官豈合賦梅花冷撰不慚中允熱
更煩屬和騁妍詞句怯雖殊才調別見輪學斷三十年
十指淋漓漫流血忽逢匠扁過吾前心悟微言口難說
冥搜角逐遂經旬不覺紛紛墮香雪尚堪火急醉其旁

卜夜直須令曉徹

余貼職右文舊語有
冷修撰熱中允之語

讀李生詩愛而有作

少年似是賈才子作語便如歐少師後生可畏吾老矣

下筆有神君勉之崩崖破壑水浩渺壞街

按壞街原本誤作攘御今

改正掣轡駒權竒徐徐勢定識歸處要以古人為矩規

次韻朱琳天球

問君着鞭胡不忙天子正欲興明堂不應止作燕雀伍
何苦不追鷓鴣行請纓未欲事南粵獻賦且可夸長楊
奈何聽訟獨辛苦日與鳧鶴分短長

戲楊丞許尉

揚侯作書倚庭柱不覺震雷掀屋去許侯一盞便醺酣

遮莫王公也箕踞兩君落魄不堪聞愁殺當年鄭廣文
看却聲丞并酒尉何曾敢說故將軍

河間令尹

東家載豆如山嶽西舍割禾無處著父老歡呼南陌頭
打鼓吹簫相燕樂今年不復似常年斗米都無百十錢
新來長官政及我夜無吠犬人得眠公家力役會不免
常苦里胥相擾亂里胥不出今幾時我自輸官不須歎
秋風嫋嫋樂無涯棗有實兮菊有花聞道長官作生日

相呼父老來排衙排衙奉上一盃酒再拜長官千萬壽
三年替去不須臾聊與斯民為父母

永錫生日以詩壽之

余與永錫同為
清河公所薦

酌君以御府黃封之酒泛君以江南白玉之卮祝君以
歲寒後凋之壽頌君以鮑背難老之詞十年聞名不相
識一日傾蓋無復疑文如錦繡可貴重行似金玉無瑕
疵詔書求賢意不淺嚴徐賈馬爭推薦大蟲老鼠本殊
科李耳韓非偶同傳看君此舉不忽忽白日青霄意氣

中上方未賜尚書履烏府先騎御史驄我當報罷歸可
必却向軍中弄刀筆今朝判得一醉無請辦黃封作生

日

昔官會稽故侍講呂公原明文請以其孫揆中
者娶余之長女旣受幣矣無何揆中與余女未
成婚而俱卒濟陰簿本中則揆中之弟也近於
同舍林德祖處見其所與石子植唱和詩子植
又余太學之舊僚也故次其韻因寄呂兼以簡

石且請德祖同賦

我昔江湖百憂集侍講寄書猶墨濕婚姻竟作覆手空
日月真如跳丸急哀哉大耿已川逝秀矣小馮今玉立
詞源江海浩奔茫句法風騷森出入石郎與我金石交
每懷見君嗟靡及種桑自比侯千户力田不願爵一級
頗聞杖屨約招携應許蓬茅助營葺欲討明珠救子饑
老矣安能發絞泣

樂棄奇育皆賦集字韻詩再次其韻示之

我家不減烏衣集何曾以沫空相濕父兄共有清白傳
家世不於名利急稍侵老景何足道粗喜汝曹皆有立
天路崢嶸在一飛承明翕習期三入乘時便可功業建
發策豈為科第及連珠合璧競名聲九棘三槐爭品級
金門他日看汝游竹隱何年助吾葺男兒志氣要軒昂
肯作楚囚相對泣

送外兄張會之

并序

外兄張大亨會之隱於當陽之野不出者三十年矣

聞余至鄧以一馬二奴相訪於百花洲上留十日而別因賦詩以送之

我見舅氏如母存舅氏之子吾弟昆昔年兒童今白髮
舊事豈復能追論烏乎外家久零落無復駟馬乘朱軒
諸甥獨我偶未死投老得郡西南奔故鄉隔遠親舊少
忽騎款段呼我門相逢握手問存歿流淚欲哭聲復吞
頗聞二頃皆負郭力田自可供晨昏兒婚女嫁都已了
翁媪屢醉茅柴渾人生如此萬事足便可送老三家村

我行四方走萬里十畝未有桑麻園欲置一錐無着處
儒冠誤我知何言買牛賣劍計已決家有竹隱堪負暄
兄能遠來復過我當釀白酒烹雞豚

送張才元大臨歸高陽兼寄楊霍

少年公子麒麟種使者選之來入貢文章到處是青錢
談笑有時飛白鳳留連太學滯遠業歎息南陵發歸夢
黃河一葦浩將往太行諸山森欲動上堂嘉慶拜庭闈
入戶壘麓迎伯仲幕中濟濟盡應劉筆下翩翩皆屈宋

四者能并蓋已難一尊可飲何妨痛老夫久客興愈闌
公子遠行情所重為見應劉借問看惟有月明千里共
送許少尹

春風無情自作惡桃花杏花總零落欲往城西看海棠
黃塵障天無住著城西有客不可留我挽其衣一領頭
夢魂夜夜繞吳越便思飛到江南州滿堂故人色欲動
競把酒杯相鄭重請君一醉不須辭尚有殘春堪斷送

憶昔行送彭子發

戰時為坐
事免官

憶昔黃梁炊未熟太學七人同日逐先生不免弟子嘲
跨下頗遭年少辱古人高誼今則亡惟有彭公色慨慷
皇華已建使者節青眼尚看同舍郎三年牢落江湖上
賴有故人相倚傍我窮九鬼輒累公公復參差我何望
世間榮辱何紛紛覆手為雨翻手雲請將得失問北叟
敢以喜愠觀子文滿斟滑盞如船大舉酒屬公公且坐
看公骨相合封侯今日入朝明日賀

送同年王粹公受代還朝

昔年講學城南館君餘二十我方冠讀書兀兀敝精神
刺口紛紛談治亂集英賜第偶追隨慈孝題名容齒間
欲將步武踵夔龍肯以功名論管晏一時意氣若風狂
二紀光陰如夢幻青眼全稀苦賤貧白頭太早傷憂患
塞上逢迎心骨驚尊前太息容顏換哀哉田叔墓已拱
老矣朱公人所慢分甘位下莫相憐羸得身強聊自諫
君去方趨魏闕朝我歸乍解軍書絆河南河北地比鄰
春後秋前花爛熳興來命駕豈吾難會訪藍橋容一盼

送張彥政歸京師

仲綱

官曹寂寞坐兀兀囊無一錢貧到骨欲歸未得住也難
客子秋來頗蕭瑟并州人情薄於紙覆雨翻雲而已矣
我頑不顧柰我何得酒陶然且歡喜府中別駕名公孫
往時闕闕推其門皎如雙壁照閭里至今文彩風流存
諸郎徃徃皆汗血超然別駕尤竒絕滿前豪傑多少人
獨向我曹相暖熱幕府轅門一事無五白爭泉半夜呼
但知得醉乃已耳頗復有客如此乎俗多我責君不然

君今去我真可憐
微官縛人不可脫
五斗看來成幾錢
君還朝廷用決矣
錯節盤根談笑裏
當權得意莫相忘
要須容此狂狷士

送趙延之億送伴高麗人歸國

九州遺迹皆禹功
高麗之通自元豐
元豐聖人湯勇智
遠交欲斷匈奴臂
越裳九譯何自來
輅車不動麗人至
至今航海輸國珍
稽首朝正禮甚馴
吾皇寤寐率昭考
寵以大國升為賓
海上凌秋潮信熟
去憑賈客船如屋

詔書揀選尚書郎持節送之恩意縟東夷北敵世為鄰
久苦誅求夷甚貧願歸莞鑰事天子厭以形勢初無因
頗聞天驕國方擾種落攻之天所討附書憑子問三韓
畏頭畏尾何時了天兵弔伐那可期幽燕本自吾遺黎
請將鴨綠釀為酒來攜王師古北口

送宋宏甫出守邠州

前年謬入文昌裏堆案簿書如黑蟻左鳧右鷺去復來
大叫發狂那得止開眼忽見同舍郎英氣律兀髯而長

時於談間出妙語似濯大暑遭風涼自夸才高足餘刃
屢以豪篇相折困我衰嘆喏安可當晉甲未興齊已遯
今年別我西入關意氣崢嶸喜動顏秦山渭水笑談裏
劍閣峨眉指顧間古公去後風俗好南畝勸耕農事早
一篇七月是圖經不待下車心已了髯卿故自讀書人
想有仁風慰彼民班取新詩一千首閉閣莫開長飲酒

宏甫家成都嘗為戶部郎余時官度
支相與同舍後自太府少卿出守

得符先生作焚香寮東郡趙鼎臣賦詩以寄之

編蒲為簾竹為牀先生一室如僧房乞米未來朝食粥
閉門不出坐焚香銅爐霏霏擢煙縷長伴詩翁作詩苦
郁然百和入肝脾散落詩中出奇語昔年我亦預言詩
裏糧問道今其時肯將司法盡傳我願與先生管香火

寄題遐觀閣

子長南遊探禹穴自誇歷覽多所列歸來落筆方著書
意與素王爭巧拙謫仙早亦勤四方沉浮江海遶齊梁
腹中領略幾萬里文焰萬丈如許長取之欲富觀欲博

貪多豈不如谿壑直將眼力徧八方達者應悲用心錯
不如五柳宅邊一老人家貧無錢常閉門時時矯首聊
寓目但見倦飛之鳥無心雲老人觀之釋然悟歸去來
兮從此賦勉旃為謝倚欄人著眼應須在渠處

屬疾在告郡中諸公相繼服藥戲作病中九客
歌

將軍膽氣凌秋天百札曾將一箭穿倒牀忽作兒女眼
悲啼出淚如湧泉會稽令尹形悍堅新買蛾眉費萬錢

未容纖腰小回旋徑煩藥餌親調煎山陰大夫祖文淵
彎弓射賊口垂涎壯士亦苦頭風偏河潤九里風化傳
坐令丞簿相牽聯請醫買藥爭後先刺中有宰正鳴絃
携琴忽泛子猷船入城卮酒不下咽但飲柴胡如吸川
沃洲公子點可憐斬關夜遁呼不前道中揮斷九鐵鞭
抱病誰復能輕便鑄錢短簿非凜然捧心欲效西子妍
青衫從事世所捐亦遭病鬼相傍緣戲成嘲語如怪顛
一讀坐使沉痾痊

次韻洪琳父 并引

中秋之夕余病因不飲聞洪琳父直宿省中亟以白
酒餉焉洪有詩見謝而未及報也至九日猶不飲因
次其韻復餉一盃為壽洪蔬食不如葷嘗約欲得余
酒當以詩取之故見於卒章

平生見酒喜欲舞不惜淋漓身上衣尊中聖賢盡莫逆
坐上賓客皆能詩陶潛欲眠無我責灌夫罵坐不汝疵
世間樂事凡四者他人多耦我獨竒今年病眠不敢飲

坐負美景辜良時中秋明月漫皎皎九日黃菊空離離
洪崖先生夙所慕文雅蘊藉今阮嵇故持濁醪作勝供
徃助脫粟陪羹藜先生學道早有得一車僅可如雞栖
相投木瓜意不淺願得瓊琚以報之

余嘗假酒於楊時可旣而償之時可不受因以
詩見餉次其韻

君家子雲老無酒好事時煩親與舊車邊大腹載鴟夷
從事督郵無不受諸孫今復可憐人官冷何嘗堪炙手

家雖有酒不自持橫來澆我談天口

猶子奕來乞酒戲以詩餉之

滄陽從事如瓠壺雖如瓠壺中不麤十圍腰腹八尺軀
出行不敢用肩輿馬壯如牛形虎如載之喘汗蹶不趨
倒牀甘寢鼻輒呼隱如雷霆驚里閭覺來長嘯忽軒渠
口叻咳唾出明珠詆嘲風月戲烏魚擔撫草木窮根鬚
大聲鏗鏘金石俱小聲要眇韻笙竽泠泠清風濯暑餘
玉壺之水列坐隅夷甫衛玠談玄虛蒙莊執策筭有無

乃知公孫不碩膚炯如列仙形甚臞瑤泉之酒出中厨
時節貢獻帝所須頗亦霑勺及吾徒知汝燥吻思江湖
作書亟遣長鬚奴焦山未沃東海枯笑我一勺安可濡
伯順以歛硯餉我因用前韻謝之并簡亨老以
助致師之請

挾山超海吾豈能章服裹之麋鹿驚平生忍饑耕破硯
字畫僅能通姓名自傳同舍有和璧未敢攫取先以聲
耿侯聞之頷且笑棄擲不啻鴻毛輕我窮正坐毛穎誤

戀著翰墨天所刑少不如人今老矣筆陣欲合陰借兵
何郎持重欲困我堅壁不聞刁斗鳴明朝一陣氣已了
大將旗鼓居吾營

次韻子磐悼畜馬死

吾聞古者八駿圖白義駮耳皆龍駒獨嘶長風志萬里
意態自與凡馬殊常時陸陸未足道一日致遠君應須
朝秣幽燕暮吳粵顧視欸段猶泥塗王良不生造父死
校計豈復分毫銖憶君初應將軍召隨身惟以一馬俱

官曹卑微騎從少豈有負弩供前驅忽然據鞍欲有適
老兵一諾費百呼空槽無芻但與飲坐令槁死城南隅
天嫌此馬非俊物如君豈合冉冉趨才高不肯露頭角
有計甘學水中鳧故令駑蹇自斃踣欲君感慨求夷途
當捐千金市絕足勿仗短策驅庸奴人生但可印如斗
世上豈患騅無烏馬骨朽時君貴矣頗應憶著敝帷無

驛中燕北使戲成

案原本分作絕句二首非是此本七古當有二首今闕其

耳一

夜長更長睡復覺欲雪不雪寒且風人如胡越不覺異
酒味聖賢聊復中客來不語雖禮簡賓去獻弓而愛同
書生多口慎勿出累聖消兵在此中

欽定四庫全書

竹隱畸士集卷四

宋 趙鼎臣 撰

五言律詩

寒日前二日直宿省中

古屋寒無禁幽眠夢不成
鼠留窺硯迹風度響牕聲
人語天將曉春陰日未明
起來搔短髮端自有餘清

雨中直宿

白日文書滿清秋
寓直頻雨愁官路滑
風喜夜涼新頭

裏千莖雪胷中萬斛塵不知窮列宿若箇是吾身

伏日還府題王村鋪

火候猶騎伏金行已立秋涼雖來緩緩熱好罷休休歲
月隨鞭箠塵埃老置郵年年禾黍熟吾道得無憂

六月十二日被檄詣邊道中即事

驅馬日尚早解鞍天向晨風雖排酷吏雨復滯行人保
障連營遠陂塘發興新荷花嬌欲語愁絕故傷神

晉陽道中

路入羊腸裏師行鼠穴中

李牧云地險狹譬如兩鼠鬪於穴中

山田如越

俗板屋類秦風形勢無加損汙隆有異同百年開壽域

興國太平功

太平興國四年王師平晉

嵐谷道中

汗漫穿巖谷悠悠不計程林鳩呼婦宿驛馬帶駒行葉
落知霜早禾登喜歲成潺湲溪水急未暇濯吾纓

過武強渡

千里跨羸馬一舟浮大河他鄉故舊少長路往來多心

欲求田耳身如作吏何荒涼三徑晚歸計日蹉跎

過銅雀臺弔魏武

慷慨勤王始艱難創業初英辭傳樂府妙畧布新書
逐鹿功雖在藏舟計已踈一朝空總帳愛子竟何如

八月十一日山中早發薄寒凝冰馬上重裘尚
未能以禦寒也時將中秋感舊而作

蕭索嵐州路天寒已著人可憐挾纊日不待飲冰辰涼
夜更籌永清秋色新去無河朔飲締綌故相親

任邱道中值雪贈權邑宰曹弋取道曹河間同僚也

宿霧寒猶重濃陰曉未分山川連野暗雞犬隔村聞浩蕩天將雪朦朧酒半醺向來臨易水長嘯欲移文

俎豆嗟何有橐鞬病未能府中嘲短簿門下養聾丞問路朝馳傳逢人夕飲水全家今飽滿此祿懼難勝

騎立山禱雨詩二首

絕壁臨無地飛泉落半天潭中看止水澗下響驚川江

漢威南及嵩卽勢北連尋山應最易騎立衆峯前
乞雨甘重繭瞻天劇戴盆無才修政事有覲傍祠門馬
足盤山肋泉聲漱石根雲霓如響答蘋藻願星奔

謝諸公惠喜雨之什

薄宦慙亡補高秋恨不歸况逢仍歲旱猶着故時衣禱
雨精誠竭憂民寢食非自惟存畎畝何以辱珠璣

喜雨

暫舉催科手來吟喜雨詩不徒人物惠且免吏民嗤三

日霖隨應千箱樂在茲為言農事好卒歲保嘻嘻

四月二十七日雨後詣府學道過辟雍不暇謁
權朝美歸以詩寄之

三日霖雨足四郊年麥稠日長渾似夏風冷却疑秋壁
水勞心曲車輪阻道周桃花如爛熳他日定來游

和欽止桐廬中道見寄二首

邂逅來隨牒因循未拂衣江鄉知舊少京國信音稀老
廢書千卷愁寬帶十圍故人鴻鵠舉燕雀自卑飛

昔忝同僚分深慚國士知髮衰將得白衣素已成緇富
貴君餘事功名彼一時臘梅如可寄為折最南枝

次韻翟經國見寄

故國幾喬木長歧數短亭日趨天闕絳坐失鬢絲青舊
著歸田賦新傳釀酒經卜隣知有日爛醉不須醒

喜聞方時敏來

浙江為客久返岸艤舟新未暇趨東閣先來覓故人碁
應緣老退詩不為家貧土物惟襄錦堪為照乘珍

寄山陰隱者

聞道山陰老春來樂有餘
饑餐一盤飯閑讀兩行書
竹裏親沽酒江邊自買魚
何曾入城市人事轉生疎

翟經國築室於鄉里人誇傳
以為盛其西吾葺溪也以詩戲之

故人高隱處近在郭門西
數仞簷楹敞滿城門戶低
便當容駟馬何止卜幽棲
更請開三徑時來過葦溪

十二月二十一日雪取道置酒於清白堂林正

仲有詩次韻

花飛何事急紈細不勝裁睡起明書幌粧成濕鏡臺多情調玉燭作意恥金壘授簡何容易相如欲到來

泛舟席上次韻祖武聞笛

虎檻留春色龍吟入酒杯響從天外去妙向曲中來但可金樽滿何勞暮鼓催獨憐羈旅客愁絕正徘徊

嘲詠詩

堯俗雖勤儉并兒可嘆嗟井牽長頸益山駕破轅車八

月霜如霰三春電似衣頭蓬非願女膏沐欠油麻

披風

脩竹不受暑暗驚疑故人暫來聊解愠徑去不驚塵汗
濕衣裳雨書翻几案鱗快哉那獨敢贈爾耜耕民

書眠

枕瓷歌姬姹屏紙漲漣漪左角蝸休鬪南柯蟻正為靜
喧閑處失憂喜夢中移吐握真賢相相邀不計時

波流一首

波流非自性綠竹蓋其姿坐得濯纓理還思垂釣時幾
人能樂水此處可無詩寄語塵埃客勤來一洒之

買花詩

老覺歡娛少愁驚歲月頻能消幾日醉又過一年春陌
上枝枝好釵頭種種新買歸持博笑貢自可憐人

竹

雨洗修篁淨風搖翠影森蒼官投分久丹穴寄懷深窈

窕蕙蘭質輕狂桃李心

按此首末二句原本脫去

無題

韻勝應難畫
肌香不受熏
拂眉煙度柳
梳鬢月侵雲
歌罷猶依扇
閑來懶繫裙
最憐能賦客
渾似卓文君

故大司成葛亞卿輓詩

次仲

行義知名早
雲霄得路遲
喜聞儒者用
忽歎哲人萎
故事留青鑠
平生有素絲
馬鳴猶躑躅
似記入朝時
璧水除官日
漳濱卧疾年
賀書猶未報
弔客已相先
夢幻真空矣
衣冠尚儼然
平生詩滿篋
當自有人傳

輓李待制浦五首

鄉黨推耆舊，朝廷重老成。
閨門無政事，孝悌有平生。
萬卷常充宇，千金不滿籬。
種成蘭玉後，華髮看昇平。

晚持安世橐，早掛隱居冠。
子貴年方壯，家嚴色更難。
古今成俯仰，歌哭異悲歡。
淚滴新阡上，風吹不肯乾。

就養今西府，趨庭國柄臣。
上思耆艾久，詔問起居頻。
贈典河圖貴，佳城馬鬣新。
丹青雖可畫，那復見斯人。

人物推河內，英靈稟太行。
先生雖隱晦，嗣子遂騰驤。
堯

舜親延接夔龍日贊襄于門高未了不惜更軒昂
往昔陪尊俎從容接話言骨雖如鶴瘦語尚作春溫一
夢人琴失流年日月奔空餘華屋處愁絕向誰論

輓傅奉議三首

行義推鄉里才華動搢紳六經常自醉一室故安貧未
覺蒲輪晚俄悲薤露新他年儒學傳莫謂史無人
往日調商鼎當年築漢壇從容作霖雨談笑斬樓蘭每
恐風流盡空餘琬琰刊承家今已矣清淚一沈瀾

為儒嗟不達射策竟知名爵命加黃壤詩書到後生高
年鳩杖貴故國錦衣榮他日蘭亭會何由見老成

輓故致政大夫詩

齊賢十八
歲登科

乍捧毛生檄初登賈傅年低回成鶴髮勉強用蒲鞭遺
愛西州說清風古國傳欲知陰德處廷尉有青氈

趙兩
任大

理丞其子
嶙復繼之

系忝宗盟重交推父黨尊淒涼思往日邂逅識朱轡華
屋者年逝衡門稚子存大岷山下路愁句向誰論

元祐
之歲

公守通利軍時先人奉使河朔往來
黎陽中余以子職侍行蓋嘗識公云

彭樂道輓詩三首

絳帳名雖早青衫位不登對因常涕泣
秦當極哀矜養氣勞存想看書廢
寢興短檠留案上不復夜挑燈
法吏真難割儒衣歎陸沉官曹曾接武
談麈獨傾心笑我趨時懶知渠味道
深微言今已矣慷慨獨沾襟

身老羞干祿家貧喜著書妙雖窮比興
麤亦到蟲魚潘令官何拙虞卿意不踈
傳詩今有子應不廢留畬

樂道
故為

郡學官晚得天府獄曹掾非其志也其於書無所不讀尤邃於詩旦起訊囚暮夜必解詩一篇究其指歸性淡泊少嗜好獨喜道家吐納存想之術自謂得其要妙頗常欲授余而未果故於哀輓之章三致其詞以悲之余於樂道蓋無所愧詞者也

劉孝叔輓詩

登科方欲冠謝病未當傳歡喜榮親日康強任子年入川將老矣返魯遂終焉他日南城路回車一愴然

唐康功輓詩二首

靖穀之子

命也人難料天乎子可憐愁看一片玉埋向九重泉已

覺荆枝悴空餘綵服鮮老親今八十行路亦悽然
意氣聞他日聲名蓋此邦膽令姦吏破心使壯夫降頓
失歆龍一仍存賈虎雙風流嗟已矣洒淚向秋江

故太原郡太夫人李氏輓歌詩二首

德配平原盛

中奉王公嘗守平原民至今思之

家傳相國親桂抽三筍

茂玉種兩株成

夫人二子尚書宣贊暨長孫侍郎咸賜科第而尚書與侍郎同時登侍從供養

滕下化劍中秋冷箴舟半夜驚凱風從此去忍聽自南聲

大郡開湯沐高堂問清溫腰金仍及壻

夫人愛壻賈侍郎紹祖亦前此

登侍從

持橐更連孫養極千鍾富身兼五福尊從今雋京

兆誰為賞平反

故安定郡太夫人郭氏輓詩二首

象服承恩日金牋告第初御前頒詔旨天上寫除書

初拜

郡夫人以上以金花五色牋御筆書詔

流水三春逝黃梁一夢虛七絃雖自

足亡已復何如

卜墓開新兆從姑返舊塋二卿銜恤意八座悼亡情蘋藻全拋却松楸已種成魚軒相逐去非復是平生